



№43 (8195)
30 қазан
БЕЙСЕНБІ,
2025 ЖЫЛ



Жылыой аудандық қоғамдық-саяси газеті

Кен Жылой


Газет 1933 жылы 4 қазаннан шыға бастады



www.facebook.com/kenzhylol
ken_jyloi_gazeti

* Инфрақұрылым

ГАЗДЫҢ ҚҰНЫ МЕН САПАСЫ: тұрғындар не дейді?



Еңірде газ бағасы қымбаттауы мүмкін. Бұл туралы «Жылыойгаз» ЖШС таратушы құбырлар арқылы табиғи газды тасымалдау тарифінің шекті деңгейін 2026-2030 жылдарға бекіту бойынша қоғамдық тыңдауында мәлімдеді. Сейсенбі күні өткен жиында жылыойлықтар «Жылыойгаз» ЖШС директоры Әлішер Мұхитов пен ҚР Ұлттық экономика министрлігі табиғи монополияларды реттеу Комитетінің Атырау облысы бойынша Департаментінің басшысы Арман Өтегеновпен кездесіп, газ бағасының өсуіне қарсылық білдірді.

➔ 3-БЕТ

* Жаһандық бастамалар



Көпвекторлы саясаттың жемісі

Биыл Қазақстанның сыртқы саясатында халықаралық ынтымақтастық тұрғысынан белсенді кезеңдердің бірі болды. Мемлекет басшысы Қасым-Жомарт Тоқаев әлемнің бірнеше мемлекетімен маңызды келіссөздер жүргізіп, стратегиялық әріптестікті кеңейтуге бағытталған бірқатар құжаттарға қол қойды.

Қысқаша талқылап өтсек, ақпан айында Астанада Қазақстан мен Түрікменстан арасындағы саяси консультациялар өтті. Кездесуде тараптар сауда-экономикалық, көлік логистикалық және энергетика салаларындағы байланыстарды дамытуға келісті. Сауда айналымын 1 миллиард АҚШ долларына жеткізу мақсаты басты назарға алынды.

Маусым айында Қазақстан мен Иран сыртқы істер министрлері келіссөз өткізіп, өзара сауда көлемін арттыру және Каспий теңізі арқылы жүк тасымалын жандандыру мәселелерін талқылады. 2024 жылы екі ел арасындағы сауда 12,3%-ға өссе, 2025 жылы бұл көрсеткіш одан әрі ұлғая түсті.

Ал сәуірде өткен стратегиялық диалог барысында Қазақстан мен Қытай энергетика, инфрақұрылым және көлік логистикасы салаларында ынтымақтастықты тереңдету туралы өзара уағдаласты. Бұл келіссөздер «Бір белдеу, бір жол» бастамасы аясында өзара тиімді жобаларды дамытуға жол ашты. Атап айту керек, «Бір белдеу, бір жол» Қытай Халық Республикасының төрағасы Си Цзиньпин әлем деңгейінде ұсынған үздік әлемдік халықаралық ынтымақтастық бастамасы болған еді. Сонымен қатар Самарканд қаласында өткен Еуропалық Одақ пен Орталық Азия елдерінің алғашқы саммитіне Қазақстан белсенді

түрде қатысты. Кездесуде тараптар сауда, энергия, су ресурстары және цифрлық даму салаларында стратегиялық серіктестікті нығайту туралы декларация қабылданды.

Ал қыркүйек айында Қазақстан мен Пәкістан «Ынтымақтастық бойынша іс-әрекет жоспарын» жүзеге асырды. Құжат саясат, экономика, қорғаныс, ғылым, мәдениет және туризм салаларын қамтиды. Бұл жоспар екі ел арасындағы байланыстарды жүйелі түрде дамытуды көздейді.

Шілдеде Мемлекет басшысы Қасым-Жомарт Тоқаев Қырғызстан Республикасымен достық пен одақтастық туралы шартты ратификациялады. Бұл құжат екі елдің саяси және экономикалық қарым-қатынасын жаңа деңгейге көтеруді мақсат етеді.

Қорытындылай келе, 2025 жылы Қазақстанның сыртқы саясаты көпвекторлы бағытты ұстана отырып, көршілес және серіктес мемлекеттермен өзара тиімді қатынастарды дамытуға басымдық берді. Бұл келіссөздер елдің халықаралық абыройын нығайтып, тұрақты даму жолын айқындай түскендей. Бұл бағыттағы табандылық және парасат Қазақстанның болашағын айқындайтын басты бағдарлардың бірі болмақ.

А.ЕРДЕНҚЫЗЫ

* Білім

Ұлттық рух – ұрпақ санасында

Аудандағы №1 мектепте «Егемен елдің өңсесі биік» атты шара өтті. Мақсаты оқушыларға Қазақстан Республикасының қалыптасу тарихы мен маңызын түсіндіру, елдің тәуелсіздігі мен бірлігіне деген құрмет сезімін арттыру, оқушыларды отансүйгіштікке, ұлттық мақтанышқа, азаматтық жауапкершілікке тәрбиелеу еді.

Ел байрағы ұлықталып, әнұранымызбен ашылған іс-шарада мектеп директорының тәрбие ісі жөніндегі орынбасары Айнаш Байғабылова сөз сөйлеп, баршаны мерекемен құттықтады. Білім ордасына енді ғана аяқ басқан мектепалды даярлық «В», «Г» сыныбының оқушылары Аян Серік, Шахназ Салық, Әли Исатай, Айғаным Таңатқызы, Інжу Шымырбай, Кәусар Еркемқызы, Назар Абаттар тебірене Отан, туған жер туралы тақпақ айтса, Данияр Темірбек, Ибрахим Нұржан, Хан-Сұлтан Қанапия, Аян Серік, Бағдан Берқалиев, Мұхаммад Инус, Нұр-Ахмет Мырзахмет, Қанағат Төлегендер қазақ биін рухты қимылмен

орындады. Оқушыларды шараға дайындаған мектепалды тәрбиеленушілерінің жетекшісі Марал Кульчиқованың миссиясы - еліміздің тұтқасын ұстар болашақ ұрпақтың бойына қазірден бастап патриоттық сезім ұялату еді. Көпшілік жас балғындарға ризашылықпен ду қол соқты. Сондай-ақ білім ордасының жоғары сынып оқушылары айтулы күн туралы тұшымды әңгімелер айтып, ән мен жырдан төгілті. Қатысушылармен қатар көрермендердің де жүрегін тебіrentкен әдемі шара осылайша жоғары деңгейде өтіп, ұмытылмас әсер қалдырды.

Ш.ХАМИТОВА

Бүгінгі сандық

Несие дауы мәмлеге келді

➔ 6-БЕТ



* Баспасөз - 2026

Кен Жылой

ГАЗЕТИНЕ 2026 ЖЫЛҒА ЖАЗЫЛУ ЖҮРІП ЖАТЫР!



ИНДЕКС:
65583

ЗАҢДЫ ТҮЛҒАЛАР ҮШІН: 1 ЖЫЛҒА - 8559, 20 ТҒ.

6 АЙҒА - 4279,60 ТҒ.

ЖЕКЕ ТҮЛҒАЛАР ҮШІН: 1 ЖЫЛҒА - 4769, 44 ТҒ.

6 АЙҒА - 2384, 72 ТҒ.

